



ԼՈՒՐԵՐ ՀԵՌԱՎՈՐ ԱՐԵՎԵԼՔԻ ԱԶԳԱՅԻՆ-ԵԿԵՂԵՑԱԿԱՆ ԿՅԱՆՔԻՑ

Վեհափառ Հայրապետի 1966 հոկտեմբերի 25 թվակիր կոնգակով, գեր. Տ. Գարեգին նորապետի եպիսկոպոսը նշանակվում է Հնդկաստանի և Հնոավոր Արեւելքի հայրապետական պատվիրակի փոխանորդ:

Հոկտեմբերի 27-ին սրբազանը Մ. Աթոռից մեկնում է իր պաշտոնատեղին՝ Սիդնեյ, տանելով իր հետ Հայոց Հայրապետի սիրո ողջույնը ու բարի մաղթանքները՝ հեռավոր Գանդեսի և Ավստրալիայի հյուրընկալ հոգերին վրա ապրող հայ հավատացյալ ժողովրդին:

Հոկտեմբերի 29-ին, իր ճանապարհի վրա, Գարեգին սրբազանը նախ հանդիպում է Ստամբուլ՝ իր ծննդավայրը, ուր երկու անգամ պատարագում և քարոզում է, Հայոց Հայրապետի ողջույններն ու օրհնությունները հաղորդում ամենապատիվ սրբազան պատրիարք հորը, հոգևորականությանը, համայնքային վարչությանը անդամներին, հավատացյալներին, այցելում եկեղեցիները, Աղզալին Ս. Փրկչի հիվանդանոցը, վարժարաններն ու Ս. Խաչ դպրեմանքը:

Նոյեմբերի 18-ին սրբազանը այցելում է Երուսաղեմ՝ Ս. Հակոբյանց վանքը, իր ուխտը կատարում Ս. Տեղյաց մեջ, պատարագում և քարոզում Մայր Տաճարում՝ հաղորդելով Հայոց Հայրապետի ողջույններն ու Ս. Էջմիածնի օրհնություններն ամենապատիվ սրբազան պատրիարք հորը, միաբանությանն ու հրաժեշտ առնում լավագույն տպավորություններով:

Նոյեմբերի 24-ին սրբազանը հասնում է Բոմբեյ: Օդանավակայանում Տ. Գարեգին եպիսկոպոսին դիմավորում են՝ եկեղեցական վարչության անդամները՝ տիկին Բաղիր, տիկին Լորդը, գոկտ. Արամ Եղիազարյանը,

Գարեգինյանը և ուրիշներ: Սրբազանն առաջնորդվում է Բոմբեյի հայոց եկեղեցին, ուր լրացուցիչ անելուց հետո, հաղորդում է Վեհափառ Հայրապետի ողջույններն ու օրհնությունները: Բոմբեյում սրբազանը զբաղվում է նաև կազմակերպական, եկեղեցական հարցերով:

Նոյեմբերի 29-ին, Տ. Գարեգին եպիսկոպոսը մեկնում է Կալկաթա: Օդանավակայանում հայրապետական փոխանորդին դիմավորում է հոգևոր հովիվ Տ. Գեղամ վրդ. Զաքարյանը՝ ի գլուխ կալկաթահայ եկեղեցական վարչության անդամների, կազմակերպությանը ներկայացուցիչների և ժողովրդի: Սրբազանը ճշրաչափառ՝ ու մուտք է գործում եկեղեցի, և ապա այստեղ ևս հաղորդում Հայոց Հայրապետի ողջույններն ու օրհնությունները կալկաթահայությանը: Սրբազանը Կալկաթայի հայոց Ս. Նազարեթյան եկեղեցում պատարագում և քարոզում է՝ շնչելով Ամենայն Հայոց Հայրապետի օրոք Մայր Աթոռ Ս. Էջմիածնի կատարած նախախնամական դերը հայ ժողովրդի կյանքում՝ հավատքի, եկեղեցասիրության և ազգապահպանման սրբազան աշխատանքների մեջ: Սրբազանը այցելում է Կալկաթայի հայոց Մարգասիրական ծննդարանը, Դավթյան օրիորդաց վարժարանը և ծերանոցը:

Դեկտեմբերի 14-ին Տ. Գարեգին եպիսկոպոսը ժամանում է Բանգկոկ, ուր ապրում են ինը հայ ընտանիքներ, որոնք տասը տարուց ի վեր զրկվել էին հայ հոգևորականի այցելությունից ու հոգևոր մխիթարությունից: Սրբազանը իր շուրջն է հավաքում հայության այդ բեկորներին, խոսում, խրախուսում Ս. Էջմիածնի սիրով ու հայրենյաց ոգով՝ հաղորդելով Հայոց Հայրապետի ողջույններն ու

օրհնությունները: Ժամերգության ավարտին բոլոր ներկաները ս. հաղորդություն են առնում:

Դեպի Սիրենյ իր ճանապարհի վրա, սրբազանը ցանկանում է այցելել նաև Բիրմա, ուր կա փառաբանիչ հայ համայնք, բայց, օտարահպատակ հոգևորականի մուտքը արգելված լինելով Բիրմա, սրբազանը ղեկտեմբերի 16-ին ժամանում է Սիրենյ: Տ. Գարեգին եպիսկոպոսին դիմավորում են Մելքունի հոգևոր հովիվ Ս. Ոսկան արքեպան և Սիրենյի հոգևոր հովիվ Ս. Արամայիս քահանան՝ ի դուրս Եկեղեցական վարչության անդամների և հոծ բազմության:

Սրբազանը առաջնորդվում է Սիրենյի հայոց Ս. Հարություն եկեղեցին, ուր մուտք է գործում «Հրաշափառ»-ով և հաղորդում Ամենայն Հայոց Հայրապետի ողջույններն ու օրհնությունները:

Դեկտեմբերի 18-ին, կիրակի օրը, հայրապետական փոխանորդ սրբազանը պատա-

րագում է և Բանին կենաց քարոզությամբ մխիթարում հավատացյալներին: Բոլորն ուրախ էին մանավանդ, որ իրենց հետ են ունենալու Հայոց Հայրապետի մնալուն ներկայացուցիչը՝ հանձին Տ. Գարեգին եպիսկոպոսի: Հաջորդ օրերին սրբազանը կատարում է մի շարք պաշտոնական այցելություններ: Տ. Գարեգին եպիսկոպոսը, որ հայրապետական պատվիրակի փոխանորդ է, իրեն հատուկ եռանդով ու նվիրումով ձեռնարկել է իր պարտականությունների կատարմանը, մանավանդ Ավստրալիայում ապրող հայ ժողովրդի ազգային-եկեղեցական կյանքը ամրապնդելու և թեմական կազմակերպությամբ օժտելու առաքելությամբ, աջակցությամբ հոգևոր զասի, Եկեղեցական Համայնքային վարչությանը և հայ հավատացյալ ժողովրդի լույս հավատքին և հայկական բարեմասնությանը:

